

671.3453
075
14

卷之五

學校志上

聖訓 廟制

祀典 學制

附鄉會
盤費

書籍 書院

商城縣志

商城縣志卷之五

知商城縣事榮河武開古纂修

學校志上

聖訓
書藉

廟制
書院

祀典

學額

學校所以教也古者上自樂正之設下至黨庠術序
無地非學卽無地非教聖謨洋洋嘉言孔彰導其始
也於論鼓鐘於樂辟廋課其實也釋奠釋菜明有尊
也書升論秀明有制也誘之以詩書六藝之文差之
以小成大成之效禮以節情樂以鳴豫其爲教者亦
備矣哉我

朝

列聖諄諄勸學爲急

先師之位祀事孔明羣籍之頒古訓是式順治九年有社
學之規雍正十一年有書院之諭他如欽射讀法賓
嘉之禮至純極備凡以納小民於軌物也商城僻處
山陬書缺有間開吉忝守茲土惟不克化道是懼夫
宣上德意使民知所向方守土者之責也故於纂學
校志謹稽

大清會典並 禮部則例學政全書有關於教者悉依類

敬編焉作學校志

聖訓

順治九年題准刊立卧碑置於明倫堂之左曉示生員

朝廷建立學校選取生員免其丁糧厚以廩膳設學院學道學官以教之各衙門官以禮相待全要養成賢才以供

朝廷之用諸生皆當上報

國恩下立人品所有教條開列於後

南城縣志 卷之三
一生員之家父母賢智者子當受教父母愚魯或有
非爲者子旣讀書明理當再三懇告使父母不陷於
危亡

一生員立志當學忠臣清官書史所載忠清事蹟務
須互相講究凡利國愛民之事更宜留心

一生員居心忠厚正直讀書方有實用出仕必作良
吏若心術邪刻讀書必無成就爲官必取禍患行害
人之事者徃徃自殺其身常宜思省

一生員不可干求官長交結勢要希圖進身若果心

善德全上天知之必加以福

一生員當愛身忍性凡有司官衙門不可輕入卽有切已之事止許家人代告不許干與他人詞訟他人亦不許牽連生員作證

一爲學當尊敬先生若講說皆須誠心聽受如有未明從容再問毋妄行辨難爲師亦當盡心教訓勿致怠惰

一軍民一切利病不許生員上書陳言如有一言建白以違制論黜革治罪

南坡集卷之五
三
一生員不許糾黨多人立盟結社把持官府武斷鄉曲所作文字不許妄行刊刻違者聽提調官治罪

康熙九年奉

上諭朕惟至治之世不專以法令爲事而以教化爲先其時人心醇良風俗樸實刑措不用比屋可封長治久安茂登上理蓋法令禁於一時而教化維於可久若徒事法令而教化不先是舍本而務末也近見風俗日敝人心不古鬪凌成習奢濫多端狙詐之術日工獄訟之興靡已或豪富凌轢孤寡或劣紳武斷鄉曲或惡衿出入衙署或蠹棍詐

害良善荏苒之劫掠時聞讐忿之殺傷疊見陷罹法網刑
所必加誅之則無知可憫宥之則憲典難寬念茲刑辟之
日繁良由化導之未善朕今欲法古帝王尙德緩刑化民
成俗舉凡敦孝弟以重人倫篤宗族以昭雍睦和鄉黨以
息爭訟重農桑以足衣食尙節儉以惜財用隆學校以端
士習黜異端以崇正學講法律以儆愚頑明禮讓以厚風
俗務本業以定民志訓子弟以禁非爲息誣告以全善良
誠窩逃以免株連完錢糧以省催科聯保甲以彌盜賊解
讐忿以重身命等項作何訓迪勸導及作何責成内外文

武該管官督率舉行爾部詳察典制定議具奏遵

旨議准應將特頒

上諭通行曉諭八旗包衣佐領并直隸各省督撫轉行府州
縣鄉村人等切實遵行務使軍民咸知尙德緩刑之
至意

康熙二十三年東

巡書萬世師表四字於闕里遂頒式於天下學宮

康熙二十五年頒

御製

至聖先師孔子贊并序

蓋自三才建而天地不居其功一中傳而聖人代宣其蘊
有行道之聖得位以綏猷有明道之聖立言以垂憲此正
學所以常明人心所以不泯也粵稽往緒仰溯前徽堯舜
禹湯文武達而在上兼君師之寄行道之聖人也孔子不
得位窮而在下秉刪述之權明道之聖人也行道者勲業
炳於一朝明道者教思周於百世堯舜文武之後不有孔
子則學術紛淆仁義湮塞斯道之失傳也久矣後之人而
欲探二帝三王之心法以爲治國平天下之準其奚所取

衷焉然則孔子之爲萬古一人也審矣朕巡省東國謁祀闕里景企滋深敬摘筆而爲之

贊曰

清濁有氣剛柔有質聖人參之人極以立行著習察舍道莫由惟皇建極惟后綏猷作君作師垂統萬古曰惟堯舜禹湯文武五百餘歲至聖挺生聲金振玉集厥大成序書刪詩定禮正樂旣窮象繫亦嚴筆削上紹往緒下示來型道不終晦秩然大經百家紛紜殊途異趣日月無踰美墻可晤孔子之道惟中與庸此心此理千聖所同孔子之德

仁義中正秉彝之好根本天性庶幾夙夜勗哉令圖遡源
洙泗景躅唐虞載歷庭除式觀禮器摘毫仰贊心焉遐企
百世而上以聖爲歸百世而下以聖爲師非師夫子惟師
於道統天御世惟道爲寶泰山巖巖東海泱泱墻高萬仞
夫子之堂孰窺其藩孰窺其徑道不遠人克念作聖

康熙二十八年頒

御製四子贊俾天下學宮皆勒石

顏子贊

聖道早聞天資獨粹約禮博文不遷不貳一善服膺萬德

來萃能化而齊其樂一致禮樂四代治法兼備用行舍藏
王佐之器

曾子贊

洙泗之傳魯以得之一貫曰唯聖學在茲明德新民止善
爲期格致誠正均平以推至德要道百行所基纂承統緒
修明訓辭

子思子贊

於穆天命道之大原靜養動察庸德庸言以育萬物以贊
乾坤九經三重大法是存篤恭愼獨成德之門卷之藏密

擴之無垠

孟子

哲人既萎楊墨昌熾子輿闢之曰仁曰義性善獨闡知言
養氣道稱堯舜學屏功利煌煌七篇並垂六藝孔學攸傳
禹功作配

康熙四十一年

御製訓飭士子文頒行直省各學

國家建立學校原以興行教化作育人才典至渥也朕臨
御以來隆重師儒加意庠序近復慎簡學使釐剔弊端務

期風教修明賢才蔚起庶幾樸作人之意乃比年士習
未端儒效罕著雖因內外臣工奉行未能盡善亦由爾諸
生積錮已久猝難改易之故也茲特親製訓言再加警飭
爾諸生其敬聽之從來學者先立品行次及文學學術事
功原委有叙爾諸生幼聞庭訓長立宮牆朝夕誦讀寧無
寃心必也躬修實踐砥礪廉隅敦孝順以事親秉忠貞以
立志窮經考業勿雜荒誕之談取友親師悉化驕盈之氣
文章歸於醇雅毋事浮華軌度式於規繩最防蕩軼于矜
佻達卽昔所譏苟行止有虧雖讀書何益若夫宅心弗淑

行已多愆或蜚語流言挾制官長或隱糧包訟出入公門
或唆撥奸猾欺孤凌弱或招呼朋類結社要盟乃如之人
名教不容鄉黨勿齒縱幸脫褫扑濫竊章縫返之於衷寧
無愧乎况夫鄉會科名乃掄才大典關係尤鉅士子果有
真才實學何患困不逢年顧乃標榜虛名暗通聲氣夤緣
詭遇罔顧身家又或改竄鄉貫希圖進取囂凌騰沸網利
營私種種弊端深可痛恨且夫士子出身之始尤貴以正
若茲厥初拜獻便已作奸犯科則異時敗檢踰閑何所不
至又安望其秉公持正爲國家宣猷樹績膺後先疏附之

選哉朕用嘉惠爾等故不禁反覆惓惓頒茲訓言爾等務
共體朕心恪遵明訓一切痛加改省爭自濯磨積行勤學
以圖上進國家三年登造束帛弓旌不特爾身有榮卽爾
祖父亦增光寵矣逢時得志寧俟他求哉若仍視爲具文
玩愒勿儆毀方躍冶暴棄自甘則是爾等冥頑無知終不
能率教也旣負栽培復干咎戾王章具在朕亦不能爲爾
等寬矣自茲以往內而國學外而直省鄉校凡學臣師長
皆有司鐸之責者並宜傳集諸生多方董勸以副朕懷否
則職業勿修咎亦難追勿謂朕言之不預也爾多士尙懍